



JABATAN PERKHIDMATAN VETERINAR

LAPORAN PEMANTAUAN MEDIA

14 JUN 2024 (JUMAAT)

Perkasa rumah sembelihan

MEDIA	RUANGAN	MUKA SURAT	TARIKH
Sinar Harian	Nasional	7	14 Jun

Perkasa rumah sembelihan

Patuhi SOP, amal konsep 'halalan toyyiban'

Oleh DIANA AZIS
PUTRAJAYA

Proses penyembelihan merupakan aktiviti yang berkait rapat dengan pengendalian haiwan ternakan untuk mendapatkan makanan berupa daging sama ada untuk tujuan persendirian, komersial atau ritual keagamaan.

Kaedah tersebut merupakan satu proses bagi mematikan haiwan dengan memotong dua urat utama pada leher atau halkum dan merih menggunakan pisau yang tajam.

Pengarah Bahagian Regulatori Veterinar, Jabatan Perkhidmatan Veterinar (DVS), Dr Mohammad Razli Abdul Razak menjelaskan, proses berkenaan tidak boleh dilakukan dengan sewenang-wenangnya bagi memastikan bahagian haiwan sembelihan dijamin bersih, berkualiti dan selamat untuk dimakan.

"Pematuhan terhadap peraturan dan prosedur operasi standard (SOP) penyembelihan juga penting supaya tidak memberi kesan kepada alam sekeliling.

"Tatacara mendapatkan daging yang baik, sihat dan berkualiti adalah dengan penyembelihan seperti disyaratkan dalam hukum syarak untuk memastikan daging itu halal, lagi baik.

"Dalam veterinar, penyediaan haiwan yang mahu disembelih pula perlu menjalani beberapa siri

pemeriksaan bagi memastikan binatang itu tidak diancam dengan penyakit dan sebagainya," katanya ketika ditemui Sinar Harian baru-baru ini.

Pengesahan

Dalam pada itu, Mohammad Razli menjelaskan, DVS akan mengeluarkan Sijil Kesihatan Veterinar (SKV) sebagai pengesahan terhadap tahap kesihatan haiwan ruminan terlibat sebelum disembelih.

Sijil tersebut katanya, perlu disahkan oleh pegawai veterinar sebelum kelulusan untuk sembelihan, sekali gus memastikan daging yang bakal diperoleh bebas dari sebarang perkara memudaratkan.

"Ternakan yang akan disembelih juga perlu disahkan sihat dan bebas daripada sebarang unsur kimia melalui pemeriksaan kesihatan fizikal atau rekod kesihatan.

"Sebelum disembelih, ternakan perlu menjalani proses 'ante-mortem' dan setelah disembelih, karkasnya perlu melepasi proses pemeriksaan daging sebelum dibenar untuk dijadikan makanan," katanya.



MOHAMMAD RAZLI

Rumah penyembelihan

Dalam pada itu Mohammad Razli memaklumkan, setakat ini terdapat sebanyak 27 rumah penyembelihan ruminan dan tiga rumah penyembelihan babi di bawah DVS di seluruh negara.

Selain itu katanya, rumah penyembelihan swasta yang dlesenkan di bawah Akta Rumah Penyembelihan (Penswastaan) 1993 pula adalah sebanyak 54 buah, melibatkan 43 bagi ternakan ruminan dan 11 rumah sembelihan babi.



Terdapat garis panduan yang perlu dipatuhi berkaitan pengendalian serta penyembelihan ternakan korban.

“Tatacara mendapatkan daging yang baik, sihat dan berkualiti adalah dengan penyembelihan seperti disyaratkan dalam hukum syarak untuk memastikan daging itu halal, lagi baik.”

- Mohammad Razli

"Rumah penyembelihan swasta perlu memenuhi syarat-syarat tertentu sebelum boleh mendapatkan lesen, terutamanya kelulusan Pihak Berkuasa Tempatan (PBT), sebab kita mahu elak premis itu didirikan di atas tanah 'haram'.

"Setelah mendapat kelulusan pihak-pihak berkenaan, barulah mereka boleh membuat permohonan kepada DVS melibatkan pemberitahuan mengenai spesies haiwan yang hendak disembelih dan sebagainya," jelas beliau.

Tambahnya, terdapat empat kategori rumah penyembelihan mengikut jenis-jenis sistem yang digunakan iaitu automatik, separa automatik, separa manual dan manual.

Dari sudut perundangan, Mohammad Razli memberitahu, terdapat dua perundangan yang terpakai ke atas rumah penyembelihan persendirian dan di luar premis iaitu Kaedah-Kaedah Binatang (Kawalan Penyembelihan) 2009 serta Akta Rumah Penyembelihan (Penswastaan) 1993 bagi pelesenan rumah penyembelihan ruminan dan babi.

Justeru beliau menegaskan, rumah penyembelihan yang menjalankan operasi tanpa lesen dan penyembelihan di luar premis tanpa permit sembelih luar boleh dikenakan penalti tidak melebihi RM10,000 jika sabit kesalahan.

Bagi kesalahan berterusan katanya, rumah penyembelihan boleh dikenakan penalti tidak melebihi RM500 bagi tiap-tiap hari atau sebahagian daripada

sehari kesalahan itu berterusan selepas sabitan.

"SOP yang ditekankan bagi penyembelihan dalam negara perlu mematuhi Amalan Perkilangan Baik (GMP) bagi semua rumah penyembelihan jabatan dan swasta.

"Bagi tujuan eksport atau antarabangsa, perlu mencapai tahap persijilan Veterinary Health Mark serta syarat-syarat lain yang dikemukakan oleh negara-negara pengimport," tegasnya.

Sembelihan korban

Dalam pada itu, menjelang sambutan Aidiladha tidak lama lagi, Mohammad Razli memaklumkan pihaknya telah menerima banyak permohonan permit penyembelihan untuk dilakukan di premis seperti masjid, surau, balai raya dan sebagainya.

Bagaimanapun, terdapat beberapa garis panduan yang perlu dipatuhi berkaitan dengan pengendalian serta penyembelihan ternakan korban.

"Penyembelihan luar bagi tujuan sembelihan korban hanya dibenarkan pada tarikh 10, 11, 12 dan 13 Zulhijah dan perlu mengikut hukum penyembelihan serta syariat ditetapkan dalam agama Islam.


"Garis panduan ini juga bertujuan memberi kesedaran kepada orang ramai terhadap risiko jangkitan penyakit selain menggalakkan penyembelihan di premis berlesen bagi memastikan daging korban bersih dan selamat untuk dimakan," ujarnya.



SOP penyembelihan ditetapkan supaya daging ternakan terjamin dari segi kebersihan, berkualiti dan selamat untuk pengguna.

Jualan hambar, saat akhir masih ada batal tempahan lembu korban

MEDIA	RUANGAN	MUKA SURAT	TARIKH
Kosmo	Negara!	18	14 Jun



MOHD. FAIZAL memberi makan lembu yang ditempah di kandang lembu miliknya di Kampung Paya Keladan, Temerloh semalam.

Jualan hambar, saat akhir masih ada batal tempahan lembu korban

TEMERLOH – Permintaan lembu yang berkurangan mendadak pada tahun ini membuatkan penternak lembu terpaksa menjual lembu pada harga sama seperti tahun lalu meskipun kos penternakan semakin meningkat.

Akibat keadaan ekonomi semasa selain dikatakan persaingan dengan lembu 'luar' juga menyaksikan jualan lembu korban pada tahun ini menurun.

Penternak lembu Mohd Faizal Said, 42, berkata, setakat ini dia hanya menjual kira-kira 35 ekor lembu berbanding tahun lalu sebanyak 77 ekor yang

berjaya dijual untuk ibadah korban.

"Memang kurang hampir separuh tahun ini mungkin sebab orang tidak ada duit dan terpaksa berjimat malah kami terpaksa bersaing dengan lembu luar (Thailand) yang dibawa masuk dan dijual dengan lebih murah.

"Tempahan yang dibuat juga ada dibatalkan dan hari ini sahaja dua ekor lembu yang ditempah untuk ibadah korban dibatalkan pembeli atas faktor ekonomi," katanya ketika ditemui di Kampung Paya Keladan

di sini semalam.

Menurutnya, pada masa ini jualan bagi lembu premium dengan berat melebihi 300 kilogram sama seperti sebelum ini iaitu RM5,200 bagi seekor.

Katanya, bagi lembu biasa pula haiwan berkenaan dijual pada harga RM4,200 seekor, manakala kerbau pada harga RM5,200.

"Pada tahun ini juga terdapat permintaan untuk kambing apabila 13 ekor telah dijual setakat ini dengan harga seekor RM950 termasuk upah lapah, pembungkusan dan penghantaran," ujarinya.

Penduduk rayu bina pagar kubur elak diceroboh anjing, warga asing

MEDIA	RUANGAN	MUKA SURAT	TARIKH
Utusan Malaysia	Dalam Negari	31	14 Jun

Penduduk rayu bina pagar kubur elak diceroboh anjing, warga asing

Oleh MUHAMMAD ZIKRI
utusannews@mediamula.com.my

PONTIAN: Bagi menjaga kesucian Tanah Perkuburan Islam Kampung Kemang, Batu 36 dekat sini, penduduk meminta pihak berkaitan membina pagar di sekelilingnya bagi menghalang diceroboh haiwan liar seperti anjing.

Seorang penduduk, Ghazali Bahrum, 64, berkata, kawasan perkuburan tersebut sering diceroboh kumpulan anjing memandangkan di sekelilingnya didiami masyarakat bukan Islam.

Lebih menyedihkan, tanah perkuburan yang wujud sejak 60 tahun lalu itu juga kerap menjadi tempat longgokan sisa binaan yang dibuang pihak tidak bertanggungjawab.

"Sedih kalau dilihat tanah perkuburan ini kerana kesuciannya tidak dipelihara dengan baik sepertimana sepatutnya kerana disebabkan tiada pagar bagi mencegah sebarang perbuatan tidak elok. Ada juga pekerja asing yang mengambil buah nipah berhampiran tanah perkuburan



GHAZALI Bahrum menunjukkan Tanah Perkuburan Islam Kampung Kemang yang perlu dibina pagar bagi menjaga kesuciannya daripada diceroboh anjing dan pihak tidak bertanggungjawab.

tersebut, tidak tahu menghormati kubur orang Islam dengan melangkah kubur-kubur yang

ada," katanya kepada *Utusan Malaysia*. Ghazali memaklumkan,

terdapat kira-kira 500 pusara di tanah perkuburan itu bagi penduduk Batu 36, Kampung

Duku, Taman Kencana, Kampung Kemang dan kawasan sekitarnya.

Sementara itu, Pengerusi Khairat Kematian Kampung Duku, Mahmood Ibrahim menyokong permintaan penduduk Kampung Kemang supaya kawasan perkuburan tersebut dipasang pagar.

Katanya, memandangkan kedudukan tanah perkuburan itu berhampiran kediaman bukan Islam, pihak berkenaan diharapkan dapat mempertimbangkan permintaan tersebut.

Malah ujarnya, ada penduduk sanggup mengebumikan jenazah ahli keluarga di tanah perkuburan lebih jauh yang terjaga dengan lebih baik.

"Mereka lebih rela ahli keluarga disemadikan di tanah perkuburan Islam di Parit Bengkok dan di Batu 30 Pengkalan Raja walaupun lebih jauh jaraknya," jelasnya.

Justeru, beliau berharap Tanah Perkuburan Islam Kampung Kemang itu terus dipelihara kesucian daripada diganggu oleh mana-mana pihak kerana telah wujud sejak sekian lama.

Alasan selaras subsidi naik harga ayam

MEDIA	RUANGAN	MUKA SURAT	TARIKH
Utusan Malaysia	Dalam Negari	32	14 Jun

Alasan selaras subsidi naik harga ayam

Oleh ZAID MOHD. NOOR,
BADRUL HAFIZAN MAT ISA,
SAFINA RAMLI, LIYANA RAMLI
dan AIN SAFRE BIDIN
utusannews@medianulla.com.my

PETALING JAYA: Para peniaga ayam menjadikan alasan pelarasan subsidi diesel sejak Isnin lalu untuk menaikkan harga bahan mentah itu.

Tinjauan *Utusan Malaysia* mendapati harga ayam di beberapa negeri naik antara 20 sen hingga 30 sen.

Di **Negeri Sembilan**, berlaku kenaikan harga ayam segar sebanyak 20 sen sejak hari pertama pelarasan subsidi diesel dilaksanakan pada 10 Jun lalu.

Bagaimanapun menurut seorang peniaga ayam di Pasar Ampangan, Alizan Tambi, 53, kenaikan tersebut bukanlah mendadak kerana harga yang diterimanya daripada pembekal naik sebanyak lima kali sepanjang sebulan lalu.

"Apabila diumumkan tentang pelarasan subsidi diesel pada 9 Jun lalu, keesokannya harga ayam diterima daripada pembekal juga naik sebanyak 20 sen iaitu kepada RM7.40 sekilogram berbanding RM7.20 sekilogram."

"Kita pun tahu apabila kawalan harga bagi ayam tamat tahun lalu, harga memang ada turun dan naiknya. Namun sejak sebulan lalu, harga ayam naik berturut-turut sebanyak lima kali."

"Harga yang kami jual iaitu RM10.90 sekilogram kepada pengguna juga masih boleh diterima iaitu dengan margin keuntungan yang memadai," katanya.

Sementara itu, tinjauan di beberapa pasar raya di Sikamat dan Senawang mendapati harga ayam segar dijual antara RM8.19 hingga RM8.90 sekilogram.

Di **Perak**, harga jualan ayam segar mencatat kenaikan di beberapa tempat.

Seorang peniaga di Pasar Awam Teluk Intan, Yusri Sanusi, 36,



PARA peniaga ayam dikatakan menjadikan alasan pelarasan subsidi diesel untuk menaikkan harga ayam.

berkata, jualan ayam segar naik 20 sen daripada RM10.80 kepada RM11 sekilogram.

"Pembekal memberi alasan kenaikan harga disebabkan kos pengangkutan meningkat disebabkan kenaikan harga diesel," katanya.

Sementara itu, di Pasar Batu Gajah, peniaga berkata, harga jualan ayam segar naik 20 sen sebelum pelarasan subsidi diesel dilaksanakan.

Peniaga, Muhammad Taufiq Meor Saradi, 27, harga ayam segar daripada pembekal kepada peruncit RM7.80 sekilogram manakala harga jualan RM12.

"Harga tersebut naik 20 sen iaitu dari RM7.60 kepada RM7.80 pada 9 Jun sehari sebelum harga pelarasan subsidi diesel dilaksanakan."

"Semalam memang ada dengar harga ayam segar akan naik 30 sen sekilogram tetapi setakat hari ini tak naik lagi."

"Risau juga takut pembeli terkejut tengok harga naik dan orang tak beli ayam, akhirnya mereka beli

ayam sejuk beku," katanya.

Di **Terengganu**, pengguna merungut dan melahirkan kebimbangan harga ayam segar akan terus meningkat menjelang Hari Raya Aidiladha, Isnin ini.

Seorang pengguna, Azizul Matmat, 43, berkata, harga ayam segar kini dijual RM10.50 sekilogram iaitu kenaikan 30 sen berbanding lebih dua minggu lalu berharga RM10.20 sekilogram.

Menurutnya, pihak berkuasa sepatutnya memastikan tidak berlaku kenaikan harga ayam segar di pasaran terutamanya selepas pelarasan subsidi bahan api tersebut.

"Saya terkejut apabila harga ayam segar naik pada hari pertama pelarasan subsidi diesel lagi sedangkan kerajaan sebelum ini memberi jaminan tidak berlaku kenaikan harga barangan keperluan yang membebaskan pengguna," katanya ketika ditemui di Pasar Chabang Tiga di sini, semalam.

Di **Pulau Pinang**, pengguna di

negeri ini mungkin terpaksa membeli ayam dengan harga tinggi yang dikaitkan dengan kenaikan harga diesel bermula Isnin lalu.

Seorang peniaga ayam, Mohd. Nasir Abdul Kalam berkata, sebelum kenaikan harga diesel lagi mereka terpaksa mendapatkan ayam pada harga agak tinggi.

"Sekarang pun harga ayam tinggi, kebanyakan peniaga memperoleh ayam dengan harga RM9.20 sekilogram dan menjual ayam pada harga antara RM11 hingga RM12 sekilogram."

"Kami tidak pasti bila harga berkenaan akan dapat bertahan selepas kenaikan harga diesel ini," katanya di sini.

Menurutnya, sebelum ini harga ayam dikawal dan peniaga boleh mendapat bekalan ayam pada harga RM8.70 sekilogram.

Dalam pada itu, katanya, bekalan ayam untuk musim perayaan Hari Raya Aidiladha dijangka mencukupi dan pengguna tidak perlu bimbang.

TERIMA KASIH

DISEDIAKAN OLEH:

**UNIT KOMUNIKASI KORPORAT
JABATAN PERKHIDMATAN VETERINAR**